

BOSNA I HERCEGOVINA  
FEDERACIJA BOSNE I HERCEGOVINE  
Fond za zaštitu okoliša Federacije Bosne i Hercegovine  
SARAJEVO

**P R A V I L N I K**

**O MJERILIMA ZA OCJENJIVANJE ZAHTJEVA ZA DODJELU SREDSTAVA  
FONDA, ODNOSNO PROGRAMA, PROJEKATA I SLIČNIH AKTIVNOSTI**

Sarajevo, mart / ožujak 2010. godine

Na osnovu člana 27. stava 4. Zakona o Fondu za zaštitu okoliša Federacije Bosne i Hercegovine („Službene novine Federacije BiH“, broj: 33/03), i člana 44. stav 3. Statuta Fonda za zaštitu okoliša Federacije Bosne i Hercegovine („Službene novine Federacije BiH“, broj: 33/06), Upravni odbor Fonda za zaštitu okoliša Federacije Bosne i Hercegovine, na prijedlog direktora Fonda i uz saglasnost Federalnog ministarstva turizma i okoliša, na sjednici održanoj dana 11. marta 2010. godine, donio je:

**P R A V I L N I K**  
**O MJERILIMA ZA OCJENJIVANJE ZAHTJEVA ZA DODJELU SREDSTAVA**  
**FONDA, ODNOSNO PROGRAMA, PROJEKATA I SLIČNIH AKTIVNOSTI**

**Član 1.**

Ovim Pravilnikom propisuju se kriteriji i mjerila za ocjenjivanje zahtjeva za dodjeljivanje sredstava Fonda.

**Član 2.**

Zahtjevi za dodjelu sredstava Fonda ocjenjuju se prema kriterijima i mjerilima propisanim ovim Pravilnikom i konkursom.

Kriteriji i mjerila za ocjenu izvedivosti ulaganja, odnosno utvrđivanja finansijske, privredne, tehničke i kadrovske sposobnosti, te očekivanih pozitivnih učinaka sredstava koja se namjeravaju uložiti, određeni u konkursnoj dokumentaciji, moraju biti u skladu sa ovim Pravilnikom.

Kod davanja zajmova, subvencija, finansijske pomoći i donacija, relevantan je stepen izvedivosti ulaganja te sposobnost korisnika sredstava prema kriterijima propisanim stavom 2. ovog člana.

Za svaki pojedini konkurs, Upravni odbor Fonda može na prijedlog direktora Fonda, utvrditi pobliže kriterije i mjerila, pod uslovom da ti kriteriji i mjerila nisu u suprotnosti sa odredbama ovog Pravilnika.

**Član 3.**

Osnovni kriteriji i mjerila za ocjenjivanje zahtjeva i određivanja prednosti pri dodjeli sredstava Fonda su:

- pripremljenost projekata, programa ili sličnih aktivnosti za koje je raspisan natječaj (pripremljenosti stručne i tehničke dokumentacije, stepen spremnosti za početak radova, visina vlastitih sredstava korisnika) do 10 bodova,
- stepen povoljnog utjecaja na okoliš (održivi razvoj, očekivano poboljšanje kvaliteta okoliša ili povećanje energetske efikasnosti, cjelovit pristup investitora u rješavanju pojedinih pitanja zaštite okoliša i energetske

- efikasnosti, ispunjenje međunarodnih obaveza, stepen prioriteta iz programa zaštite okoliša) do 30 bodova,
- kvaliteta ponuđenog tehnološkog rješenja do 20 bodova,
- stepen ugroženosti okoliša (zaštićena područja, zaštićene biljne, gljivne i životinjske vrste, zaštićeni minerali i fosili, ekološki značajna područja, stepen smanjenja onečišćenja okoliša i negativnog utjecaja na okoliš i zdravlje ljudi, postupanje na temelju rješenja inspekcije radi uklanjanja rizičnih tačaka za okoliš i zdravlje ljudi) do 30 bodova,
- finansijska sposobnost korisnika sredstava na ulaganja i povrat sredstva, ako je povrat sredstava ugovoren do 10 bodova.

#### **Član 4.**

Najveći broj bodova koji se može dodijeliti korisniku sredstava Fonda, propisan članom 3. ovog Pravilnika, iznosi 100 bodova.

Prednost pri dodjeli sredstava Fonda imaju korisnici sredstava sa većim brojem ostvarenih bodova.

U slučaju da bilo koji od kriterija iz člana 3. ovog Pravilnika nije ispunjen, i po njemu je dodijeljeno nula (0) bodova, Fond će odbiti zahtjev ili zatražiti dopunu zahtjeva u kojoj se određuje i rok za dostavu dopune.

Zahtjev će se odbiti ako se u navedenom roku ne dopuni, a dopunjeni zahtjev ponovo se razmatra i ocjenjuje temeljem člana 3. ovog Pravilnika.

#### **Član 5.**

Na temelju ocjene zahtjeva prema kriterijima i mjerilima iz člana 3. ovog Pravilnika i ostvarenom broju bodova, zaprimljeni zahtjevi svrstavaju se na listu prednosti s obzirom na broj ostvarenih bodova.

Odluku o utvrđivanju liste prednosti i dodjeli sredstava Fonda na temelju objavljenog konkursa donosi Upravni odbor.

Ako se ne objavi konkurs za korištenje sredstava Fonda iz razloga propisanih Zakonom o Fondu za zaštitu okoliša Federacije Bosne i Hercegovine i općim aktima Fonda, odluku o dodjeli sredstava donosi Upravni odbor Fonda ili direktor Fonda, svaki u okviru svog djelokruga.

#### **Član 6.**

Na temelju odluke Upravnog odbora Fonda iz člana 6. ovog Pravilnika, direktor Fonda s korisnikom sredstava sklapa ugovor o korištenju sredstava Fonda.

Ugovorom iz stava 1. ovog člana, utvrđuju se iznosi odobrenih sredstava Fonda, dinamika njihove dodjele, uslovi i način korištenja dodijeljenih sredstava, način praćenja namjenskog korištenja dodijeljenih sredstava, te uređuju ostala međusobna prava i obaveze korisnika sredstava i Fonda.

Ako odluku o dodjeli sredstava u sklopu svojih ovlaštenja donosi direktor Fonda, na postupak dodjele sredstava i sklapanja ugovora o dodjeli sredstava odgovarajuće se primjenjuju odredbe ovog Pravilnika.

### **Član 7.**

Ovaj Pravilnik stupa na snagu danom objavljivanja u "Službenim novinama Federacije BiH".

PREDSJEDNIK  
UPRAVNOG ODBORA  
Mr. Pero M. Goluža, dipl.ing.

Broj: 12/05-2-2010.  
Sarajevo, 11. mart/ožujak 2010. godine